

四庫全書

史部

欽定四庫全書

史部

欽定八旗通志卷

二百五至
二百六

欽定四庫全書

欽定八旗通志卷二百五

人物志八十五

大臣傳七十一

漢軍鑲紅旗三
肯 張仲舉

郭世隆 哲爾
黃秉中 王國棟

黃廷桂

郭世隆

郭世隆漢軍鑲紅旗人父洪臣原籍汾州順治二年英親王阿濟格統師至九江收降明故將左良

王之子夢庚及部衆來京入旗洪臣與焉分轄降衆為佐領康熙四年世隆襲管佐領八年授禮部員外郎二十五年擢監察御史二十七年

命赴盛京察審

福陵守兵赴訴其兄冤死事得誣良刑逼自縊狀原審侍郎阿禮瑚及司員俱坐失實褫革世隆還京疏言盛京刑部凡已經告發事件執法結斷者甚少夤緣和息者居多以故曲直莫分刁誣愈熾近有旗人

宜爾根控訴命案先經私和後復涉訟仍不審結
乞

敕嚴察私和之兩造及聽許部員究實情而肅法紀又疏

言

盛京鳳凰城及山海關各設有迎送朝鮮貢使之五
品官數員每逢貢使至以一員迎送此外別無職
守且既有通事官從鳳凰城隨行至京沿途撥兵
護送料理食物夫役車輛迎送官實屬贅設應行

裁汰又疏言設官久任以其能熟悉民風土俗而去弊興利也若不肖之徒往往以久任滋弊如盜採人侵律有重典惟不肖官弁與奸民熟習互相容隱故弊竇彌多每年報部採獲之數不及千觔而京師及各省貨賣者不啻百倍皆由開原邊口縱奸民盜採山海關又縱其私販宜分別故縱失察嚴定處分其守口官員與山海關城守尉應每年更換以清弊源疏並下部議行又

詔山海關官兵停止盛京將軍管轄降調現任城守尉照
張家口例兵部選員更換十月擢內閣學士是月

上謁

孝陵過通州有陝西禮縣民訴知縣萬世緯知府紀元婪

取狀

命世隆往會督撫察審鞫實萬世緯貪婪科派杖斃縣民
論斬紀元受賄舉為卓異論絞二十九年四月充
國史副總裁七月直隸巡撫于成龍內陞左都御史

以世隆代之先是戶部奏鑲紅旗罷任安溪知縣
孫鏞首福建巡撫張仲舉布政使張永茂催徵
恩免錢糧侵隱入己

上遣郎中吳爾泰等往會總督興永朝勘訊既而

上聞吳爾泰甫至即拘訊知府六人牽連州縣官數十人
乃

命世隆往世隆至則研訊司府州縣胥役數人得張仲舉
與布政使張汧索取州縣賦冊竄改撤銷齎解批

迴重造司冊侵隱已徵地丁額銀作民欠蠲免狀
又張汧陞湖廣巡撫虧帑三十餘萬因仲舉前任
湖廣布政使亦虧帑相約互抵仲舉勒道府捏具
借帑印領給按察使田慶曾令出結署藩司事及
張永茂抵任仲舉聞張汧在湖廣贓私敗露閩帑
尚未補完復截留府州縣額支官俸役食令慶曾
給永茂又令永茂加取各屬齎解銀火耗代為彌
補諸左証悉合遂先釋吳爾泰所拘之府州縣官

回任窮詰仲舉永茂慶曾各語塞并孫鏞控列雜
贓亦鞠實仲舉侵那二十六萬三千餘兩擬斬永
茂科斂一萬七千餘兩擬絞慶曾受賄二千二百
兩擬徒各追贓入官被勒之屬員及改造冊檔書
吏概免罪疏入

上切責吳爾泰謬妄革去郎中發黑龍江効力世隆疏下
法司如擬行九月世隆將至巡撫任

諭曰凡接任好官者難于成龍居官甚好繼之不易爾係

有才之人當勤謹任事三十年二月疏言直隸守巡二道分管通省錢糧刑名與各省布按兩司無異應改部選為請

旨簡授

上是其言下部從之是年順天保定真定永平諸屬夏旱秋水

詔世隆履勘撫綏世隆察奏七十四州縣本年及來年額賦分別蠲緩其受災較重之霸州文安大城永清

真定井陘獲鹿元氏贊皇高邑臨城行唐靈壽寧
晉十四州縣發賑四月又遵

諭詳籌積貯之務疏言荒歉之歲以每州縣飢民萬口為
率大口四合小口二合按名賑給有五六千石之
糧可供半年之食今直隸捐納米穀一百三十萬
石有奇應均撥收貯州縣大者存五千石中者存
四千石小者存三千石庶可隨時變通賑濟荒歉
常平倉米今歲平糶六十三萬二千石有奇例應

歲內買補恐米價因之益昂應展限來歲五月其
原糶之州縣官雖有陞遷事故亦令本員買還以
撥應貯之州縣收倉庶杜推諉䟽下部從之三十
一年二月䟽言奉天所屬州縣連年大有米穀贏
餘請

敕山海關但禁大車裝載暫聽旗人民人肩挑駝負進關
轉糶則永平等處米價可以漸平䟽下部議自三
月至八月如所請行十一月䟽言宣化向設鎮道

及十衛六廳與各營分理錢糧驛務廳員限于佐
貳營衛皆屬武弁政多扞格宜裁六廳十衛改設
一府八縣

上是其言令世隆分晰定擬尋奏改宣化衛為宣化府附
郭前衛為宣化縣萬全右衛為萬全縣懷安衛為
懷安縣蔚州衛為蔚縣龍門衛為龍門縣懷來衛
為懷來縣赤城堡為赤城縣順聖川西城為西寧
縣三十二年四月以真定路當孔道地方遼濶自

裁去總兵後分防弁兵甚少奏移紫荊關副將駐
真定酌調各營馬步兵二千添設守備千總把總
等官分撥汛防以龍泉關叅將移駐紫荊關以真
定營遊擊移駐龍泉關三十三年四月以霸州等
處因子牙河堤決田畝被淹已遵

旨賑濟平糶其大城縣趙扶村之南隄青縣之楊村隄至
東子牙隄雄縣蒲淀五官淀之東隄請即修築又
黑龍港河及王家口久經淤塞請開浚深通得

旨俞允三十四年二月擢閩浙總督三十五年五月疏言
閩省兵餉歲需銀一百三十四萬兩有奇本省額
徵僅一百萬兩有奇向皆撥用雜稅及浙江協餉
今雨澤愆期民間荒歉難以催徵請撥鄰省帑銀
三十萬兩以為協餉俟民力稍舒徵補存貯以備
不時之需三十六年浙海關監督李雯請移寧波
城外之關于鎮海縣增設紅毛館以便洋船貿易
世隆言鎮海距寧波僅六十餘里洋船既至鎮海

即可直抵府城移闕設館于商民無所利益仍舊
為便次年又疏言泉州府向徵落地鹽稅銀一千
五百九十兩有奇所屬七縣派引行鹽徵課五千
五百八十兩有奇若依巡鹽御史鍾申保所奏改
落地鹽稅為派引徵課又加引七縣行鹽恐將來
新引壅滯鹽價日昂有累民戶請仍循定例疏並
下部議從之四十一年十月調兩廣總督四十二
年七月疏言粵東自南澳起經碣石鎮至虎門協

海面二千餘里守汛遼濶請增設兵船于遙對南
澳之澄海協以資巡防海門一所最為緊要應移
達濠營遊擊守備千總把總駐劄改為海門營以
海門所守備移為達濠營守備甲子一所乃險要
海口從前止設千總一員應以鎮左營移駐與碣
石鎮聯絡防守吳川營隔海百餘里有碣洲一島
宜以龍門協所屬之乾體營兵令白鶴寨守備千
總把總統之駐劄碣洲改為碣洲營白鶴寨即以

千總管領至平海大鵬二所逼近巨海應專設二營其順德一鎮外有香山虎門二協內有省會駐防兵可裁去總兵官止留遊擊為順德營改鎮標左營為平海營右營為大鵬營下部議如所請四十三年四月疏言前奏添造戰船俱經報竣設立船兵自南澳至龍門令守備千總把總逐日帶領巡哨副將叅將遊擊每月會巡一次水師總兵於春秋季駕船二十分巡外洋至瓊州上年十一月

至今年二月先後擊敗賊衆於沱濤外洋沈賊船
六斗頭角海面沈賊船一瓊南萬崖二處海面沈
賊船二四十五年五月疏報海洋巨盜蔡玉也等
聚衆劫掠商船今已擒獲分別定擬斬流得

旨遣刑部侍郎常綬往勘覆奏蔡玉也等五人應立斬部
議世隆平時禁戢不嚴及事發又朦朧掩飾應革
職於是罷任四十六年六月起授湖廣總督四十
七年十二月條奏防守紅苗三款一沿邊安設塘

汎已經周密惟盛華哨起至鎮溪所一帶山高箐
密難於瞭望應酌撥鎮筭兵八百名另設四營分
駐每日派官一員帶兵五十名遊巡一舊日苗來
內地民往苗叢每滋事端今以塘汎為界址苗除
納糧買賣外不得擅入塘汎之內民亦不得擅出
塘汎之外違者治罪一內地奸民與苗人結親至
勾通為匪不可究詰嗣後如有前弊應斷離異下
部議從之四十九年六月疏劾祭告南嶽之翰林

院侍讀學士陳壯履繞道嘉魚滋擾驛站得

旨降陳壯履為編修十月世隆內遷刑部尚書五十年十

月以山西太原流匪陳四等六十餘人携婦女數

十乘馬羸由湖北往湖南貴州詭稱赴雲南開墾

索取州縣口糧刦掠商賈財物世隆前任總督不

即察究縱容滋蔓革職罷任五十二年三月遇

萬壽慶典復原品五十五年九月卒年七十有二後祀直

隸福建浙江廣東廣西湖廣名宦

哲爾肯

哲爾肯漢軍鑲紅旗人由佐領授刑部員外郎康熙十一年遷中城御史十三年六月因吳逆之亂隨大軍出征江西十四年授都督僉事任南贛總兵十五年八月以舉首偽將軍高得捷逆書敘功加都督同知十一月敗賊於九渡水擒斬偽總兵副將又敗之南康縣復潭鋪斬首千餘十二月廣東從逆提督嚴自明總兵張星耀逼南康縣哲爾

肯與將軍舒恕斬賊萬餘破其營十七賊遁南安
均得

旨獎叙十六年四月

上以大軍攻圍長沙吳逆窮蹙欲往衡州慮其侵犯贛州
吉安等處分我兵勢

命哲爾肯與總督董衛國分佈防禦偵情形不時奏

聞十七年正月與舒恕遣官於江廣交界之九鄉招撫偽
總兵賴榮等十七員兵萬餘又遣遊擊楊以松敗

賊於鷓鴣寨斬偽副將等十餘斬獲六千有奇叙
功加左都督十八年二月兩廣總督金光祖疏請
復設廣西提督

上命哲爾肯任之八月疏言臣駐潯州三合嘴彈壓兩江
接應大兵但慶遠太平思恩三府逼交趾接雲貴
為粵西藩籬今逆賊苗蠻嘯聚負固臣請統兵先
往南寧會同將軍莽依圖相機剿撫

上可其奏並

諭原駐之三合嘴倘屬緊要可發兵汛守十月疏報泗城
土知府岑繼祿向化歸誠下部知之十一月疏言
提標設兵舊制馬一步九今廣西餘孽未靖需戰
馬甚多請改為步八馬二從之十九年因與逆藩
尚之信結親部議革職得

旨從寬留任戴罪圖功二十一年疏言懷集營兵業經奉
旨裁汰但僻處深山必得官兵彈壓今酌撥潯協守備一
兵三百佈防歸潯州副將兼轄下部議行二十二

年卒於官

賜祭葬如例題請入祀江西名宦祠

張仲舉

張仲舉漢軍鑲紅旗人由筆帖式任通政司知事

康熙十六年正月奉

旨揀發福建署泉州府知府三月海賊張七糾衆數千夜

犯新西北三門奸民啟之入仲舉率家丁同副將

馮昭京等大敗賊生擒張七八月山寇朱寅結海

逆鄭錦偽將軍李復貴等犯南安仲舉隨副都統
楊鳳翔提督段應舉剿殲賊衆生擒寅復貴及偽
軍師林日向等十月總督卽廷相請卽以仲舉補
授泉州府知府

允之十七年正月康親王傑書令仲舉往諭鄭錦降錦不
從且遣偽總督劉國軒偽提督吳淑何佑等陷海
澄長泰圍泉州仲舉親冒矢石出家資鑄械犒軍
晝夜嬰城固守兩月餘會大軍克興化漳州寧海

將軍喇哈達率兵抵安溪賊始解圍去十月巡撫
吳興祚表上守城功擢興泉道十八年錦遣僞右
武將軍林盛據東石康親王檄仲舉取賊船從水
路會勦大軍遂復東石十九年江西按察使缺員
九卿會推左通政張可前大理寺少卿張永祺合
詞保仲舉畫題時御史唐朝彛曰我閩人也知仲
舉為官平常不應保九卿因劾朝彛不早言

詔宥之二十年仲舉隨興祚復廈門金門尋遷山東按察

使二十二年遷湖南布政使二十五年三月入

覲奏言宋儒周敦頤程顥程頤張載邵雍朱熹各有專祠

乞

賜額得

旨前哲有功聖學允宜表彰

御書學達性天額

頒發各祠及白鹿洞嶽麓兩書院四月擢福建巡撫二十

六年疏言臺灣設府縣學應考人數無多未便照

內地額請府學量設廩增各二十名縣學各十名
俟人才漸盛補照直省額廩生出貢自康熙二十
七年始照例舉行部議從之二十七年二月疏言
漳州所屬龍巖與漳平界連向因龍巖地廣將田
百二十餘頃撥隸漳平其糧轉付巖戶代納官民
交累請即歸漳平徵收九月又言臺灣十營兵米
每年約三萬六千石現存粟僅支五月旱蝗為災
乏食可慮請酌撥帑帑三萬兩就產米處所買貯

備給候部文動帑實恐遲誤謹先發司帑一萬採
買其二萬俟文到日再撥俱下部議行二十八年
三月疏言民間例禁私藏鳥鎗但航海商船防護
不可無資請視視船大小酌帶六桿四桿再臺灣番
民資生納餉均藉捕鹿有用竹弓箭及鳥鎗者應
請免繳仍禁增制又言臺灣所用明桂王偽號錢
甚多若一時全禁貧民無以為資請開爐鼓鑄收
買偽錢銷燬部議均如所請六月疏言番民以捕

鹿資生前因東洋興販禁兵民捕獵惟畚民得捕
藉向社商等易布及米益社商按季納餉今既停
興販前禁頓弛兵民持械四出鹿靡孑遺不但畚
民之日用資且彼此攘奪易滋擾請仍禁止事下
部議以興販既停鹿皮將售何處恐地方官借以
自利令總督興永朝確查永朝覆奏畚民捕鹿資
生納課隨處皆可轉售有司實因社餉起見並非
圖利請如仲舉議

允之九月疏言福清縣三面臨海民皆壩海為田自海寇
不靖民竄堤壞沃產化為海國前縣冊報時未經
聲明荒陷無徵確數今逐畝清丈計缺額糧銀九
千九百九十餘兩米三百四十石有奇復業之民
慮缺額未豁不敢來歸良田盡成荆棘請將無田
之糧豁免又沿海各州縣田多未墾保無隱匿查
康熙五年閩省清丈田畝止及界內應將界外補
行清丈下部議以福清墾三千六百六十餘頃已

於康熙二十六年起科並未題報缺額今請豁免
亦應令永朝確查其界外田應否清丈并詳議嗣
永朝奏此項荒田實因前令鄧獻英將荒陷田畝
統報墾數及額賦無徵始報明實無欺隱邀豁等
弊其沿海界外田自遷棄以來閱年既久界址混
淆亦應如仲舉議清丈得

旨允行二十九年正月疏言宋儒朱熹祖籍徽州府之婺源
熹父松官閩遂家焉故有閩徽二派今熹十八

世嫡孫濬籲請承襲查明代原有五經博士二員
分主祀事請即令濬承襲主閩派祀下所司議行
先是安溪革職知縣孫鏞赴部首告仲舉及布政
使張永茂侵蝕庫帑六月

遣吏部郎中吳爾泰同興永朝勘訊既而

上聞吳爾泰甫至即逮訊知府二及州縣官數十

諭曰吳爾泰乃一司官將此事妄為張大亦未可定著內
閣學士郭世隆前往詳訊尋訊得仲舉與前布政使張

汧索州縣賦冊竄改撤銷齎解批迴重造司冊侵
隱已徵地丁額銀捏作民欠汧遷湖廣巡撫齎帑
三十餘萬因仲舉前任湖南布政時亦虧帑相約
互抵仲舉勒道府具借帑印領給按察使田慶曾
令出結署事及永茂受代仲舉聞汧在湖廣以賊
敗閩帑尚未補完復截留府州縣額支官俸役食
令慶曾給永茂又令永茂加取各屬齎解銀火耗
代為彌補仲舉共侵挪銀二十六萬三千餘兩依

律擬斬監候尋病歿

黃秉中

黃秉中漢軍鑲紅旗人初由廕監生任兵部筆帖式康熙二十年授山東范縣知縣二十八年遷貴州黔西州知州尋內陞刑部員外郎三十四年遷吏部郎中四十年授監察御史四十一年五月疏言各部院具題事宜奉有

諭旨必由內閣發科抄然後施行惟綠頭牌摺子口傳

諭旨即行不由內閣不發科抄日後無從查考請嗣後於

奉

旨遵行後即錄原奏並所奉

諭旨移送內閣封呈

御覽如偶有錯誤

勅令更正俱發內閣登記以備稽核又欽奉清字

諭旨各衙門譯漢奉行恐字句亦有未符宜令原奏官員

送內閣繕譯遵照傳抄疏入下部確議部臣以事

涉繁瑣議駁得

旨凡口傳諭旨及綠頭牌摺子啟奏事件著各衙門於每月終彙開奏覽四十四年二月疏言科道官由滿洲漢軍陞補者大抵積俸二十餘年漢人一為知縣俸滿三年行取到部即得考選科道殊覺太驟請嗣後行取知縣先以六部主事用俟練習有年始許考選

上閱奏

諭大學士曰御史黃秉中條奏行取知縣即補科道未免
太過此言誠當下九卿詹事科道會同確議議如所請
著為例六月遷內閣侍讀學士四十七年十月擢
內閣學士值浙江水災

命往同巡撫賑飢十二月授浙江巡撫四十八年七月疏
言寧波紹興等處連歲歉收米價騰貴計惟招商
可平而溫台二府豐收米賤格於出洋之禁請許
商民由內洋販運以濟寧紹從之四十九年署總

督事同提督王世臣疏報盜劫龍游縣村莊為官
兵追逐逃至遂昌縣山中處州右營都司張朝臣
率兵搜勦遇盜六七十人抵拒朝臣被槍刺腹死
隨有金衢兩協官兵齊至捕盜斬殺殆盡疏下兵
部議部臣言盜夥六七十人非尋常盜案可比且
都司已槍刺殞命而兵丁無一損傷顯有隱報情
弊

上命遣部院賢能司官一員往會巡撫將軍副都統至都

司張朝臣陣亡處詳察情由議奏於是兵部郎中
察爾欽等會勘奏言隨張朝臣之兵丁張斌同時
陣亡潘文彩傷重致死並有烏鎗兵五人因失火
藥發焚死部議張朝臣張斌潘文彩予卹如例疎
防及救援不力隱匿不報各官治罪有差秉中不
察劾應降一級留任

上以秉中前此奏報不實

命降五級戴罪圖功九月調福建巡撫五十年六月同總

督范時崇提督藍理以泉州盜陳顯五等結夥二千餘人搶掠永春德化漳平大田等縣居民入奏

上曰督撫提鎮等平時不能撫卹百姓訓練兵丁及事出又不能相機即行勦撫縱容賊盜滋蔓騷擾地方肆行搶奪又遲延日久始行奏聞反稱百姓不廢耕織照常安業凡強盜竊盜合夥至三四十人百姓尚且畏懼逃避今數逾二千豈得謂百姓不廢耕織安居舊業乎明係掩飾誑奏下部嚴察部議治罪革職有差

命革藍理職免治罪秉中與范時崇免革職降五級戴罪
効力十月因前任浙江巡撫時不効奏糧道陳鑾
改折漕糧事革任罰賠五十一年三月

命以子牙河分司効力三年期滿直隸巡撫趙宏燮奏秉
中自脩工料修防隄岸俱各穩固下部議敘給還
原品五十七年五月卒長子廷鑑次子廷鈺三子
廷桂廷桂官至大學士世襲三等伯別有傳

王國棟

王國棟漢軍鑲紅旗人康熙五十二年進士改庶吉士五十四年授檢討五十七年充會試同考官逾年遷國子監司業六十年授侍講尋轉侍讀雍正元年三月充陝西鄉試正考官四月復設

日講起居注官以國棟充補六月遷侍讀學士十一月充廣東鄉試正考官二年六月授右通政八月充會試同考官十月

命為河南學政四年五月遷光祿寺卿十月

特旨授浙江觀風整俗使國棟抵任以浙江風俗澆漓諸
務廢弛仰遵

聖訓首以尊親大義宣諭紳士懲頑抗以清積欠究包訟
以警奸徒革虛冒以飭營伍嚴保甲以弭盜源巡
歷所至據實以

聞

溫諭獎之是年遷宗人府府丞五年二月

上以浙江被水米價騰貴

命國棟同巡撫李衛動帑銀四萬兩于杭州嘉興湖州三府修城濬河築堤俾民傭食力國棟奏杭州至海寧河淤應濬太湖隄閘及嘉興石塘多坍應修理但冬春雨雪多興工必過費俟九十月水落再行疏濬

上是其言五月擢湖南巡撫

諭曰本欲令爾在浙整飭數年以期成效但湖南廢弛日久急需治理今命爾巡撫其地勉之八月疏言督撫大

吏去任者固不可沽譽市恩新蒞者尤當加意整飭風聲所播庶可令行禁止若意示寬大則吏治必弛民情必慢事難整理

諭嘉國棟得治理寬嚴之要惟期實力行之時

上命湖廣總督邁柱會修兩省隄工國棟疏言長沙岳州常德三郡逼近洞庭如湘陰巴陵華容安鄉澧州武陵龍陽沅江益陽九州縣環繞大湖隄塍甚多居民恒于秋冬水涸時築隄堵水而耕但地勢卑

下每江漲水不能洩反灌入湖以致隄岸衝決田禾淹沒民難安堵現有潰口四百餘處已飭水利各官刻期完築此外險工次第興修更嚴禁包折等弊務期加高培厚工程堅固七年六月疏言岳州府屬遼澗中隔洞庭石門慈利俱係苗疆九谿永定軍屯雜處文移每至稽遲有鞭長不及之慮請改所屬澧州為直隸州轄石門慈利安鄉三縣改九谿永定二衛為一縣設知縣教諭訓導巡檢

各一員初僉都御史申大成奏黔省軍田百姓賤
價頂種易啟紛爭請徧民田一體買賣畝納稅五
錢官給照為業並推行各省七月國棟疏言湖南
軍田瘠薄不比黔省膏腴均與民田一例買賣無
賤價頂種之弊其科則輸賦較民田更重若照黔
例稅五錢是合屯糧十餘年常賦之數斷非民力
能勝應按各屬屯糧全書分別差等其微價頂種
未立賣券糧仍軍戶者令頂種人納稅五錢給照

為業如時價平買並非頂種糧未過割者照屯糧
一石稅五錢給照過割其已過割者稅二錢至龍
陽武陵長靖諸屯田土下賦重應令售主按券價
每兩稅三分諸疏並下部議行先是湖南靖州逆
犯曾靜遣其徒張熙投逆書于川陝總督岳鍾琪
鍾琪以

聞

上命刑部侍郎杭奕祿副都統海蘭至湖南偕國棟拘訊

國棟據曾靜妄供並未究出黨羽又阿其那塞思
黑門下太監以罪徙廣西流言于路直隸河南督
撫並查奏國棟稱湖南接解兵役未聞一語又茶
陵州黨犯陳蒂西傳播流言

敕國棟提問亦不得證實九月降

旨切責十月革職回京八年正月

命辦理刑部右侍郎事十月充武會試副考官十一月署

山東巡撫國棟前任河南學政時薦教職申程章

才品俱優

特旨申程章以知州銜授浙江海寧知縣後遷江蘇淮安知府以詐典商楊紀益商程星所贓為巡撫尹繼善所糾部議國棟濫舉應革任得

旨寬留九年二月河南祥符封邱等縣水災

詔國棟往查賑七月署江蘇巡撫尋署浙江巡撫十年仍回刑部侍郎任十一年偕尚書彭維新等稽察京通各倉十二年以與尚書福敏等議福建民藍厚

正毆斃胞兄事失當

敕責其糊塗姑息下部嚴察部議降三級調用以國棟係革職留任之員無級可降應革任得

旨派充苦差十三年十月

命署刑部右侍郎十二月卒

黃廷桂

黃廷桂漢軍鑲紅旗人父秉中官福建巡撫有傳康熙四十九年廷桂由監生襲曾祖憲章所遺雲

騎尉世職五十二年遷三等侍衛五十九年補叅
領雍正三年授直隸宣化鎮總兵五年二月擢四
川提督六月疏陳營伍地方五事一軍械宜速製
川省三面環夷自平西藏青海後多缺額不堪用
現飭確查修補一馬廠宜別建川馬本不高大又
日繫槽致多羸現訪得豐樂場後荒山六十里派
弁督牧其附郭舊廠追出募墾一士卒驕奢宜禁
川省自年羹堯濫賞放縱至今習氣未除現飭服

用絹布母僭官制一番蠻防範宜密每歲十月間
生熟番蠻至內地傭工名為下壩次年夏初始歸
近禁携婦女隻身合夥成羣肆惡應飭携家屬數
名口方許至内地形跡可疑者查禁一汛守地宜
均成都屬德陽仁壽二縣北南距數百里歸一把
總駐防永寧協駐貴州永寧縣城中隔河河東隸
黔河西隸川兵民岐視非邊隘所宜奉

旨與總督岳鍾琪會商行十一月奏嚴緝竊賊及賭具

諭曰牧民之官果肯執法懲奸諒未有不畏懼者大都褻玩之生率由日久懈弛有意縱捨所致故禁令之弗行其咎惟在不公不明而不在不嚴也夫法猶治病之藥取攻疾而已過於峻利則元氣必大傷知乎此斯知過猛之不足為貴矣又奏建昌番蠻新隸版籍竊掠時聞臣飭擒嚴懲又省城設防火堆棚三十每營救火兵二十得

旨嘉獎六年二月請設義學於提標五營及城守兩營

諭曰義學一事各省提鎮及駐防將軍等往往以此奏請
朕俱未准行從來文武並為國家器用不可偏有重輕
汝意專以崇文為善舉歟子弟讀書一道非魯鈍者所
能須俊秀者方可夫以少年聰穎之資既習禮儀稍通
文墨猶思荷戈執殳甘為前驅乎勢必漸染日久流為
怯懦將來俊秀者咸不願為兵而亦不能為兵矣營伍
中所餘無非魯鈍一流欲求干城之選豈可得哉是非
興文之良策實乃廢武之歧途譬猶驅鄉塾生童教習

槽盾徒誤其文而已武亦莫能就也似此邀虛名而無實益之舉將焉用之至云營伍錢糧冊籍乏人查對因此之故而令闔營俊秀子弟皆至文武兩相廢棄詎不更謬凡事但宜隨地隨時斟酌損益期於辦理無悞則已何必思及分外創新立異始為美談耶三月奏報烏蒙米貼苗婦陸氏不法傷雲南兵已檄永寧遵義將弁援勦

諭獎其機宜妥協會四川雷波土司楊明義陰助陸氏誘

附近結覺阿魯阿照平底等苗刦糧陸氏就擒廷
桂及鍾琪請勦明義

詔廷桂偕總兵張耀祖會勦九月軍至拉密擒明義并獲
造謀人卑祖及匪目業姑物祖等

諭曰首惡渠魁陸續被擒朕嘉悅覽焉撫勦餘孽無涉輕
率詳慎為之尋奏結覺賊酋雙尺阿魯賊酋魯佩及阿
不羅賊酋覺過均就擒斬馘近萬

諭曰覽奏斬獲情形何啻獵人弋獲禽獸倘兵退仍復如

故將如之何亦豈有盡行殺戮不留噍類之理乎當詳思善於措置之道為要十月奏勦附近黃螂之確里密等處枝夷底定後併力翦除阿都及阿驢報

聞十二月確里密賊酋利耶為我軍殲斃阿都苗擒獻其酋阿必阿驢苗亦就撫七年正月廷桂奏軍事竣諭曰此番底定之功仰荷

上天垂庇

聖祖錫佑兼賴汝等提鎮大臣及將弁兵丁胥能効忠奮

勇之所致也朕深為嘉悅尋疏陳苗疆地方情形得

旨番俗苗情歷歷如繪絲毫無隱朕甚嘉之惟善後一著最為要務殫心竭力共相籌酌必得良策庶幾永寧四

月奏湖北容美土司田旻如遣土遊擊至四川建始縣界徵花絲銀已咨湖北督撫提督查究

諭曰楚蜀各土司中惟容美最為富強緣自前明官吏玩愒弛縱遂致越分僭禮相沿成習迄今尚未改也地方大吏應曉以大義漸令革除若據濫給委牌科斂絲花

等款即坐以狂悖之罪似屬太過已密諭楚督邁柱令其嚴飭田畀如矣汝等慮其疑畏不遽根究之意甚是
尋奏籌勦瞻對賊蠻得

旨瞻對雖微亦不可輕視凡事槩以敬慎處之七月奏太
平營都司卹見信讒虐兵致合營交甲求退請革
職

諭曰借輕信讒言苦虐衆兵一語遂欲倖免結黨挾制之
罪豈可得乎類茲刁風不宜滋長當嚴查為首者重懲

示儆部見若仍留本營勢不相安另揀賢員調補十一
月請開採黃螂等處銅鉛資鼓鑄

諭曰此奏識見殊屬庸愚之至所謂守突奧之熒燭未仰
天庭而覩白日者也雷波黃螂一帶地方與新撫涼山
諸夷壤疇交錯第宜示以靜鎮胡可興起利端若聽民
開採各處流亡無藉之徒勢必羣相趨赴萬一釀生事
故所關匪淺汝其會同憲德速將金竹坪白蠟山等處
凡出產銅鉛礦廠槩行封禁嚴加防範稍有奉行不力

脫至紛紜黃廷桂憲德之身家性命未足以償厥辜也

廷桂奏謝

聖訓得

旨向後一切事宜務須詳慎為要率爾之見何可瀆陳朕覽所奏倘亦如汝遽即見諸施行竟至滋擾地方其害曷勝枚舉豈引咎頌聖數語所堪了結者如云曾經審思原非率爾則已之才識實屬不逮可知愈當加勉詳慎十二月奏緝獲妖言逆犯楊大銘等十九人并檄酉

陽土司獻首惡楊七

諭曰此事最宜詳慎勿俾無知弁員憑威迫脇激出事端
朕意或係奸匪捏詞妄供希圖推卸亦未可定料該土
司未必有此事也八年正月奏楊七果獲於楊隘嘴並
非酉陽境內

諭曰朕非有過人技能但較汝等克誠克公耳凡人為一
己利害是非之心切則遇事接物動輒有過不及之失
勉公與誠斯為對症之藥嗣酉陽改土歸流十二月奏

報猱賊滋事調兵戰克金鎖關墨鐵關黃草坪等處恢復永善得

旨官兵之奮勇爭先汝之調度合宜深為可嘉據鄂爾泰亦有川省將領此番勞效較勝滇省張耀祖遠甚之奏勉旃九年三月大軍勦噶爾丹策凌

上以川陝地廣又理軍需總督一員難控制

特增設四川總督即以廷桂補授兼管提督印務六月請將川省常平倉捐穀改銀款數悉照雲貴現行例

諭曰川省乃產米之鄉籌畫積貯尚易為力該督撫遽請開捐誤矣且欲改穀作銀又復將銀買穀輾轉滋弊更屬悖謬但通省倉廩止有四十餘萬石為數太少著另議增貯十年八月奏遣總兵趙儒勦捕兇斯賊番

諭曰務期一舉戡定以收永遠綏靖之功毋得潦草結局今賊番敢於猖獗者皆由汝從前未經料理妥協所遺之患設不能奮勉立效以贖前愆二罪併罰恐汝等難以克當矣十二月捷奏至奉

諭嘉獎十一年奏獲大竹縣奸民文興貴文射斗等

上嘉之十三年五月疏報夏熟收成數

諭曰際茲盈寧之慶當益加凜畏更勉公忠試思川省屢

蒙

天佑頻錫豐年豈文武不和各立門戶排擠乖爭之風所

能感召者耶若因此而自以為是任情肆念殊非所以

仰答

天貺矣亟宜返躬內省倘有不愼於中極力改悔毋稍逡

巡六月奏貴州古州逆苗包利枉利漢奸張九萬等糾衆陷清溪餘慶等縣四川建昌永寧俱苗疆界連貴州臣飭各員弁加意撫緝苗民勿為煽惑

諭以不動聲色靜鎮慎密為要乾隆元年正月西陲軍務竣裁四川總督廷桂仍為提督其總督缺後於十三年復設十二月

命來京候旨二年補鑾儀使尋署天津鎮總兵三年實授五年遷古北口提督六年七月

諭曰古北口為畿輔藩籬該提標所屬弁兵素稱勁旅
今因出口行圍親臨簡閱見隊伍整齊技藝嫺熟洵
由統領大員董率有方將弁兵丁勤於練習所致朕
甚嘉之黃廷桂已賞馬二匹著再加恩賞上用緞二
疋九月授甘肅巡撫九年疏奏恤孤貧瘞枯骨勸輸
社倉清查監獄開渠灌田及教民種樹紡織各事
均得

旨嘉獎十二年署陝甘總督十三年四月奏練兵三事

一技藝分三等示激勸一馬步兵逐名考驗一前鋒戎轟母許遠迎露積

詔如所請行十二月授兩江總督十四年五月疏言江西俗悍有司因循姑息致不安分之人動輒喧鬧滋事臣飭嚴拿究辦又各營僅按日輪操南方晴少雨多轉多閒曠臣令於陰雨時擇公所及寬敞寺院內如式操練又挽強命中最為要技現飭造七力及十力硬弓教演其弱者不得過六力

諭曰汝至江西頗知整飭振作但不可欲速而要之以
久可也九月議奏裁併衛所事宜擬將漕船少之儀
徵衛併入揚州衛金山衛併入鎮海衛揚州四幫
併入三幫鎮江中幫併入前後兩幫共裁守備二
千總四下部議行尋奏立限清查積案報

聞十五年二月加太子少保七月奏赴運河豆班集漫
口撫恤災戶

諭率屬詳查妥辦八月奏奉賢縣奸民李如岡等聚衆

結猛將會擾害地方臣飭屬拏獲首從各犯得

旨重處示警毋姑息十月疏叅江蘇巡撫雅爾哈善於
奏銷錢糧奉

旨訓飭忽將知縣許惟枚等十一員特叅送臣會稿畫
題臣查惟枚等經徵未完均不及一分例止停陞
罰俸今盡請革職人必以為欽奉

嚴旨非巡撫本意其居心更屬巧詐得

旨所叅甚是雅爾哈善交部嚴議尋議革職留任十六

年

聖駕南巡

御製詩賜之曰迎鑾衛警蹕建節久旬宣體我勤民德
嘉卿率屬賢何須張錦帳惟喜閱鱗田細驗剛柔俗
周諮豐歉年咸中方有慶虛己自無偏此地人文盛
還淳尚勉旃是年調陝甘總督十八年正月調四川
總督八月奏川省歲豐穀賤

命轉輸二十萬石賑淮陽被水州縣

御製詩紀其事曰全蜀幸逢年教開移粟船不因讀漢
詔拯溺自應然十二月晋吏部尚書留川督任十九
年二月重慶奸民譚二陳琨等謀逆廷桂擒首從
十四人置於法九月疏言川省惟成都府屬地平
衍又有都江大堰灌溉餘各屬山田臣令勘修塘
堰引灌新都蘆山等十州縣及青神縣蓮花壩樂
山縣平江鄉三台縣南明鎮悉變膏腴報

聞二十年五月請增鼓鑄為通省修城用

諭曰有益地方之事詳妥為之是月晉

武英殿大學士兼管總督事六月打箭爐外孔撒麻
書兩土司構釁金川及綽斯甲布袒麻書革布什
咱及德爾格忒袒孔撒互攻殺廷桂偕提督岳鍾
璜飭諭解散尋調陝甘總督十二月奏言軍營文
報緊要向派大員管理不若就近責成沿邊提鎮
詔如所請二十一年二月奏從前各處調解軍營之馬
多不堪用一由口外嚴寒一由弁兵作樂自安西

至哈密經戈壁十餘站餉飲不時致多疲斃現派都司守脩等官分站專管河州靖逆兩副將往來稽查將積貯草豆經過馬匹住歇時刻行走廕分各情形按日呈報臣令標員赴各站查察並安西提督及哈密防鎮不時就近督催得

旨嘉獎四月

命駐肅州督辦軍需五月奏西北兩路軍營向通商販後因撤兵禁止今巴里坤軍營一應牛羊等物專

由肅州一帶販往路遠價昂難資接濟請照舊通
商部議從之十月請設巴里坤理事同知一

上允之十一月奏吐魯番回人莽阿里克與厄魯特潛
謀叛逆其人在巴里坤哈密貿易者甚多恐暗通
信息臣調安西兵千赴兩處分駐但兵數尚少若
向內地調撥又慮張皇現有派赴巴里坤種地兵
五百塔勒納沁種地兵二百即令同往防守再晉
省解到之駝出關未久若趕赴軍營須撥兵防護

已截留安西一帶牧放其續調馬亦於哈密附近
留牧至馬匹尚須豫籌陝甘兩省選得三萬令加
緊餉牧備調但陝省距甘肅路遠按站行需五六
十日請先調來甘分撥加意飼養陸續行走可收
實用

諭曰黃廷桂經理軍務籌畫精詳一切調度甚合機宜
大臣能如此明決擔承實心體國深可嘉悅著賞雙
眼孔雀翎并加賞騎都尉世職令其子承襲二十二

年正月

上以廷桂與巴里坤辦事大臣雅爾哈善札商戰馬一事意存推諉

訓諭之三月奏言臣節次解送出口馬二萬七千五百餘統於三月十五日以前全抵巴里坤餘隨後補解又出口駝四千二百餘續到者亦隨時解往應用報

聞尋軍營大臣奏廷桂所解馬依限到且臚壯堪用

諭獎其辦理妥速交部議敘十月

命續解馬八千廷桂奏前自準噶爾脫出之官兵等久居邊地嫻牧務請即令解往得

旨俞允十一月又續解馬四千無悞

諭部議敘十二月奏言甘肅有墊辦軍需銀十萬餘兩請飭各員自行彌補其半

上嘉廷桂賢勞在事各員奮勉

特命蠲免並

賞廷桂銀一萬兩二十三年二月奏軍需辦解將竣即
屈春耕請暫停可緩之糧運又豫備正餘馬一萬
七千駝五千餘陸續解巴里坤

諭獎其悉心調劑四月

諭酌議伊犁駐兵屯田事五月疏叅甘肅布政使武忱
糧道成德怠玩悞公漠視軍務

詔革職時奉

旨於直隸山東山西河南陝西購馬一萬由肅州轉送

巴里坤備來年進剿之用廷桂酌定餉牧事宜又
籌運糧十萬石於巴里坤

諭曰甘省連年辦理軍需黃廷桂急公集事俱無貽悞
今歲春夏以來一切轉運糧餉復甚妥協深慰朕懷
著加恩再賞銀一萬兩七月奏言臣因西路大軍駐
庫車糧運甚要聞有自哈密直趨吐魯番之路委
員勘得夾山路徑驛駝皆可行較由巴里坤路近
現奉

旨籌庫車阿克蘇等城糧運可否行車臣已委員迅勘
若俟覆到日始由巴里坤辦運未免稍遲不若先
徑運至吐魯番再由彼轉運因擬將哈密現辦車
驟留半運巴里坤所貯糧分半竟由哈密運至吐
魯番收貯仍俟直督及山陝撫臣購駝驟到日均
由哈密運軍營回空時將吐魯番糧轉運軍營較
巴里坤省往返二十餘站

諭曰黃廷桂所奏籌辦庫車糧運一摺甚合機宜若拘

泥成規必俟查明道路解到駝隻始由巴里坤起運
即極力儼赴已需時日朕正在降旨籌辦而黃廷桂
即能計慮及此請將糧石運貯吐魯番與朕旨適相
脗合聞奏不勝欣慰黃廷桂身體素弱如此悉心計
畫朕不惟嘉之且深憐之也是月加少保十二月廷
桂奏臣奉

旨購辦牛羊查內地牛羊不習口外水土成羣趕解易
斃且耕作屆期未免難購惟羊尚可購四五萬此

時口外嚴寒請於來年二月起程接濟軍食又酌撥銀二十萬解阿克蘇買回城米

詔如所議行尋

諭曰大學士管陝甘總督黃廷桂忠誠素著老成練達西陲用兵以來雖未身歷行陣而籌辦一切軍需動協機宜多有朕所降諭旨尚未到肅而適相脗合旋即奏到與朕所規畫不約而同者數年以來若非黃廷桂體國奉公不遺餘力安得精詳妥協若此而毫

不累民內地若無事者然此其功為尤大宜晉崇階
用彰勞績著由騎都尉晉封三等伯並賞紅寶石帽
頂四團龍補服以示優異尋

賜所封伯爵號忠勤二十四年正月廷桂以督辦軍需
抵涼州病劇猶勉視事布政使蔣炳以

聞

上命駙福隆安帶御醫往診視甫行而廷桂卒遺疏
至

諭曰黃廷桂忠誠敏達幹練老成歷任封疆勤勞懋著
西陲用兵以來籌辦軍需事事精詳妥協倚畀方深
是以迭加寵錫用彰勞績昨據蔣炳奏到在涼偶感
風寒力疾視事舊恙增劇即派福隆安帶同御醫馳
驛前往診視以冀速痊遽聞溘逝深為震悼覽其遺
摺當彌留之際尚拳拳以西師垂竣籌辦軍需為念
益見體國奉公赤忱罔斁不知聲與涕俱難以自禁
即著福隆安前往奠醊賞銀一萬兩交地方官料理

喪事並入祀賢良祠其伯爵即令伊子承襲應得卹典仍著該部察例具奏尋

諭廷桂靈柩所過地方文武員弁出城奠醊并派員沿途護送

賜祭葬如例謚文襄

御製輓辭曰華鐙廣樂正陳時扼掣驚聞辰尾騎

慈慶朝儀難並輟強酬節物淚雙垂屈指軍興逮五年儲胥事事合機先亶惟良弼蒼生福痛惜推心敢問

天馬利軍行粟賑民彌留兩事尚諄諄鞠躬盡瘁今誠已
葛亮而來此一人運籌力疾尚勞心驛館誰為下鵲
鉞賜賻行將歸故里椒漿寫痛定親臨封疆歷三十
餘年公正廉明衆共傳

皇考時臣所餘幾鼻酸然復思愀然廷桂柩至京

上親臨奠醊

詩曰事繁食少赤星頽易簣諄諄餉務裁公謹卒官父
子感馬光還陝士民哀忍將巫祝先桃茢載共公卿

酹玉壘奪我良臣一何遽不教留聽凱歌迴二十五
年凱宴成功諸將士

上追念廷桂

御製詩有獨憶儲胥宣力者凱迴未見惜斯人之句尋
命圖形

紫光閣

御製贊曰外任封疆內司綸綍俾理儲胥經權弗詘殫
誠盡智事協予心未同凱宴痛惜曷任四十四年

御製懷舊詩列廷桂於五督臣首

詩曰西陲用兵時軍需信要務統勲既罷斥特用就熟
路擘畫實盡勞諸事皆弗誤而以民為重從不加征
賦遇災仍賑恤入告直陳故可比主吏蕭關中勤供
輸以此論功勲章服錫異數為政頗尚嚴赫赫名久
著然而公無私任勞任怨素

兩朝所造就似此誠罕遇廷桂孫嘉襲伯爵卒子文燦襲
現任鑲白旗漢軍副都統嘉弟模歷官湖廣鎮守

總兵降藍翎侍衛檢歷官福建巡撫漢軍副都統
降藍翎侍衛廷桂原襲之雲騎尉世職從弟廷樞
襲

欽定八旗通志卷二百五

欽定四庫全書

欽定八旗通志卷二百六

人物志八十六

大臣傳七十二

漢軍正藍旗一遇

李率泰 剛阿泰 巴顏

劉宏

佟岱

佟國印

馬如璧

劉仲錦

張朝璘

佟國瑤

佟養甲

李日光

秦世楨

佟養性

佟養性遼東人先世為滿洲居佟佳以地為氏因

業商遷撫順天命初見

太祖高皇帝功德日盛傾心輸款為明所覺置之獄潛出
來歸

賜尚宗室女號曰西屋裏額駙授三等男六年從克遼陽

晉二等子天聰五年正月

太宗文皇帝命督造紅衣礮初軍營未備火器至是礮成
鑄曰天祐助威大將軍征行則載以從養性掌焉
時漢軍未分旗

勅養性總理官民俱受節制額駙李永芳及明副將石廷

柱鮑承先等先後來降者與佟氏族人皆為所屬
上以漢官漸多慮養性無以服衆志

特諭養性曰凡漢人事務付爾總理各官分別賢否以聞
爾亦當殫厥忠忱簡善絀惡恤兵撫民竭力供職勿私
庇親戚故舊陵轢疎遠仇讐致負朕委任之意昔廉頗
藺相如一將一相以爭班位幾成嫌釁宰相如重視國
事不念私讐是以令名垂於千祀願爾效之又

諭諸漢官曰爾衆官如能恪遵約束非僅敬養性是重國

體而欽法令也八月從

上征明大軍圍明總兵祖大壽於大凌河養性秉方畧率

漢軍載紅衣礮立營於錦州通衢擊敵城西隅臺

降守臺兵又擊城南隅壞樓堞翼日擊東一臺臺

圯守者宵遁進殲之九月明關內兵援錦州

上遣親軍擊敵養性勒漢軍五百從敵望風遁明監軍道

張春與總兵吳襄等赴援大凌河乘夜向城

上督騎兵破之方追奔明潰卒復陣養性承

旨屯敵營東舉礮攻燬敵營十月攻克子章臺礮擊臺垛
臺內兵死者無算十一月祖大壽以大凌河城降
上命城中所得鎗礮鉛藥悉付養性尋率兵攻克馬家湖
臺自大凌河至廣寧明所置臺墩悉毀之六年正
月

上幸演武場

閱兵養性率所轄漢軍試礮擐甲列陣

上嘉其軍容整肅且以出兵大凌河時能遵

方畧有克敵功

賜雕鞍良馬一白金百兩設宴勞之四月

上親征察哈爾

命隨貝勒阿巴泰等留守瀋陽七月奉

勅宣諭大凌河投誠各官察哈爾之役

上命叅領延布祿佐領董山移哈爾占所貯糧於烏蘭哈

達延布祿調遣失人遲久不至下廷臣會議罪當

死有

旨覆勘

諭曰倘情有可矜則釋之衆皆言法不當宥養性奏曰延
布祿等不留賢員協助而用不更事之人誤也罪
固應死或懲責而曲貸之實惟

聖恩前鋒叅領圖魯什亦以懲之而全其生為請
上允二人議延布祿等遂從末減未幾養性卒於官

詔以其子普漢襲爵普漢卒弟六十襲崇德七年隸漢軍

正藍旗順治初六十屢遇

恩詔晉三等伯仕至本旗都統十三年

世祖章皇帝追錄舊勲

賜養性謚曰勤惠六十卒子國瑤襲爵自有傳

劉宏遇

劉宏遇遼東人初與其弟奇遇並以諸生隨明總
兵祖大壽幕下為叅謀天命七年

太祖高皇帝征明次三岔河宏遇同奇遇挈家來歸並以
明邊境兵馬數目及戰守事宜陳奏

上遣鄂克兌諭之曰得廣寧城後當授爾官嗣以明將士
來降者衆宏遇間居遼陽

太宗文皇帝崇德元年宏遇上書自陳乞錄用

命大學士范文程等試之謂可任文職遂授宏文院副理
事官後分漢軍為八旗宏遇隸正藍旗順治元年
三月以繙譯遼金元三史告成

賚白金鞍馬尋任工部理事官十月授山西朔州道二年
四月偕副將侯大節等督兵勦蔣家峪黑草嘴諸

賊擒斬甚衆五月擢陝西布政使四月考績稱最
五年擢安徽巡撫值叛鎮金聲桓騷擾江右江北
土賊蜂起宏遇駐池州飭兵守禦分遣鎮將授策
搜勦渠寇王貳甫等次第就擒復自池州移駐安
慶與總督馬國柱會勦英山霍山潛山諸賊連破
賊巢擒斬渠魁孔文燦等餘黨悉平六年五月裁
安徽巡撫

召還七年二月授山西巡撫先是叛鎮姜瓖踞大同其黨

分據平陽保德寧武代州五臺連結榆林靖邊府
谷諸邑土賊四出寇掠至是壤伏誅餘黨竄匿山
谷宏遇奏請免逋賦甦驛困矜恤諸死事家又言
郡邑甫遭兵燹民田荒蕪殆盡前此大兵征伐大
同徵輸芻糧竭蹶以供今尚有保德五臺府谷餘
賊未滅日需輸輓復值二麥未收秋禾遇蝗災耕
種失望臣承撫宇之責仰體

皇上視民如傷之意不敢不以實陳得

旨下所司蠲賑尋與總督佟養量總兵剛阿泰協勦五臺
山賊劉永忠高鼎等於曹家寨攻毀賊巢俘斬略
盡十年陝西賊楊茂等竄入平陽遣兵招降之宏
遇撫山西四年建忠烈祠以祀守土諸臣死姜瓖
之亂者葺太原府陽曲縣學宮修築汾河諸堤會
以逮捕土賊王眼張義國孔朝貴閻守福等未入
奏即籍沒解部有

旨下所司察核宏遇坐罰俸給事中張璿劾宏遇不請

旨徑行籍沒罪在專擅疏復下所司議再罰俸尋奉

詔甄別督撫吏部以宏遇功少過多請

旨降調旋授福建督糧道十八年九月卒於官祀山西名

宦

李率泰

李率泰漢軍正藍旗人李永芳次子也初名延齡
年十二即入侍

禁廷

太祖高皇帝賜令名年十六以宗室女妻之

太宗文皇帝親征察哈爾朝鮮及明錦州率泰俱從崇德八年隨貝勒阿巴泰征明至山東有勞績洊擢副都統順治元年正月授刑部叅政兼副都統率兵駐防錦州四月隨睿親王多爾袞入山海關破流賊李自成尋同都統金礪招撫天津又率寧遠駐防兵平定山東河南擒斬滿家洞賊將趙應元降其衆萬人二年隨豫親王多鐸破流賊於潼關移

師南征克揚州下江寧分領精兵三百徇蘇州松江所過城邑悉撫定惟江陰閉城抗拒督兵攻破之三年隨端重親王博洛下杭州定福建敘功授世職為二等輕車都尉復以考滿兼一雲騎尉五年海賊犯福州漳泉諸郡

詔率泰與靖南將軍辰泰同心協謀前往誅勦至則擒斬賊渠曾慶等及餘黨數萬賊鄭彩連踪數千盤踞長樂連江城邑率泰會辰泰分兵夾擊盡驅出海

恢復二縣又統師直入興化生擒偽總督顧世臣等十一人斬之興化平先是福州為賊困十四月城中民相食江西賊郭天才偽稱援兵自杉關長驅抵福州駐兵洪塘載米麥江上誘郡民出就食會率泰提師抵建寧聞之間道飛檄巡撫使偵備賊乃夜焚洪山橋掠就食者千人以遁率泰至命有司收賊遺粟以甦餘民巡按御史周世科大治姦杵釘鉸之刑拷掠士民恣取財賄巨萬率泰白

之巡撫會劾之世科伏誅六年從征大同叛鎮姜
瓌下保德州擒斬賊黨牛化麟等敘功加一雲騎
尉先是順治元年更定官制名叅政曰侍郎率泰
仍以刑部侍郎兼任副都統事八年閏二月調吏
部侍郎三月授宏文院大學士六月條奏三事一
懲貪酷官吏一給滿洲兵丁馬匹草料一酌量營
造工程次第

上從之七月坐與大學士辰泰誤增

恩詔赦款復巧飾誑奏罷任降世職為騎都尉尋遇

恩詔加一雲騎尉九年正月以吏部奉

恩詔予襲太濫

命削雲騎尉十一月奉

特旨晉三等男十年六月以大學士洪承疇薦授兩廣總

督

諭曰率泰當永不敘用經畧輔臣既保為總督特允所舉
著改過自新以圖報稱時明桂王朱由榔居安隆其帥

李定國擁兵粵西十一年土賊廖篤增等結連定國為寇率泰遣兵分道進剿陣斬篤增於玉版巢十二年定國犯粵東率泰領兵禦之敗其將高文貴會靖南將軍珠瑪喇率禁旅至合兵夾擊破之於新會城下乘勝追逐克復高州雷州諸郡所至軫恤民賴以安方新會被圍時城中糧盡且食人兵衆掠婦女千餘口率泰言於諸將盡釋之十三年

詔加太子太保調浙閩總督

諭以浙閩重地軍務方殷勅到即兼程赴任時逆賊鄭成功招集亡命嘯聚海濱為江南浙江福建寇害率泰既蒞任相度形勢以賊揚帆鼓楫來往無常倘不急整舟師慮難擒勦特疏增設水軍三千復與撫臣劉漢祚動帑遴員刻期伐木增造唬哨各船百餘為戰禦計十四年招降海寇陳德容並疏言捕勦鄭逆宜離其黨與散其羽翼以撫佐勦又言

鄭成功之父芝龍不宜流徙寧古塔恐其地近海
由此而遁為患滋大

上悉是其言併

飭所司嚴守芝龍是年敘前破李定國功晉一等男考滿
加少保十五年正月招降賊黨偽都督唐邦杰偽
副將林紳葉祿等三月奏

允調直隸山東河南山西江西步兵萬人赴浙防守海汛
會鄭成功犯溫郡平陽瑞安俱陷浙東告警率泰

請調江寧滿洲兵助剿賊退走七月

詔分浙閩總督為二以都統趙國祚為浙江總督駐溫州而以率泰總督福建駐福州九月賊據南安嶺窺福州賊黨陳斌既降復叛率千餘人據羅星塔率泰馳檄會師焚其巨艦千餘賊遁因以舟師圍之斌降率泰奏斌屢叛狀誅於福州城南十六年以會審羅源縣敗逃事不詳究供詞部議瞻徇應革職得

旨革去世職仍留總督任兵部又追論率泰總督浙閩時不能保固封疆應革任復得

旨寬免罰俸一年仍戴罪圖功自贖康熙元年正月率泰以漳州為全閩門戶奏增設水師二千及副將遊擊等官時定海小埕賊眾盤踞率泰密會靖南王耿繼茂遣兵擊走之又萬安所先經遷毀偽總兵楊宣等復於其地壘新城率泰會提臣馬得功調兵夾剿賊不能支揚帆遠遁六月招降偽總兵林

俊奇等六十一員兵千餘人二年九月降偽忠靖
伯陳輝等一百三十餘員兵一千六百及家屬八
百餘人十月招降賊將何義魏明等復統建寧延
平邵武將弁三路進剿山賊獲逆渠王鐵佛斬之
未幾海賊五百餘人由梁山突犯內地率泰遣總
兵王進功叅將折光秋夾擊大敗之俘斬甚衆復
與耿繼茂統率大兵航海攻克廈門垂勝取浯嶼
金門二島逆賊鄭錦周全斌等勢窮宵遁三年二

月擒斬寧化山賊錢禾四月招降偽總兵林國樑
五月大兵至八尺門偽威遠將軍翁求多率兵民
六萬餘人納款率泰夜半渡海進拔銅山焚毀賊
巢斬首三千三百餘級偽永安侯王廷等率家屬
兵民等三萬餘人出降獲船艦軍械無算鄭錦僅
以數十艘遁走臺灣

聖祖仁皇帝優旨嘉獎下部議敘加秩正一品六月率泰
以疾求罷

諭曰覽奏知病是實當即允所請但閩省投誠官員兵民
最為繁衆著親行安插務使得所事竣日然後來京聞
六月遣總兵李長榮等出洋勦賊擒偽總兵張賢
時閩海廈門各島悉已蕩平惟南山鎮海佛潭橋
猶為餘孽盤踞九月率泰飭總兵官劉進忠等進
勦陣斬賊黨七千有奇招撫男婦萬餘人十月別
遣兵會勦茶仔畚山寇生擒賊首余角俘斬餘黨
無算四年三月再以疾求罷

上慰留之六月以漳汀二府地甚遼濶奏定守漳道仍駐
漳州巡建道仍兼轄延平守建道自建寧改駐汀
州兼轄邵武五年正月卒於官遺疏言閩海餘氛
遠竄臺灣奉

旨撤兵與民休息洵為至計惟是將衆兵繁若撤之太驟
則易致驚疑太遲又恐貽患目下當安反側之心
日久務防難制之勢紅毛夾板船雖已回國然往
來頻仍異時恐生釁端閩省兵馬錢糧專望協餉

倘若外解不周則有意外之虞至數年以來令濱海居民遷移內地咸苦失其故業宜畧寬界限俾獲耕漁稍甦殘喘疏上得

旨李率泰原以才能蒙

世祖章皇帝特簡浙閩總督自任總督以來克副簡任之意殫力報効勦撫賊寇多建功績且忠清素著正資調度今以久任巖疆積勞病殞深可憫惻下所司議

卹加兵部尚書

予祭奠如典禮謚忠襄明年敘功追贈一等男子正宗襲

剛阿泰

剛阿泰漢軍正藍旗人李永芳第三子也幼隨父
自撫順所來歸及長屢從征伐順治五年十一月
授九江總兵未任值叛鎮姜瓖作亂改授宣府總
兵明年三月至鎮時山西至宣化山賊並起懷來
所屬之礮山狼窩蔚州所屬之三澗辛莊黑山所
在屯聚剛阿泰甫蒞任即率兵赴懷來逼礮山而

營遣叅將頗重耀等分兵攻狼窩殪賊甚多磬山賊首王海等懼悉衆來歸會辛莊賊却桃花堡剛阿泰移兵疾馳抵蔚州率兵搜山賊糾衆三百拒戰我軍奮擊斬馘七十餘賊敗竄追勦至黑山設伏山隘攜礮具進攻賊潰伏發悉殲之獲其牲畜罷械三澗等賊聞風就撫五月奉

命勦易州土寇遣叅將羅映台等進兵麻黃谷以巨礮燬其巢復統兵自紫荆關循邊牆搜勦至昌平屬鎮

邊城撫定其衆乃還鎮六月疏言臣任宣鎮兩月
三勦山寇共招撫賊首王海等二十三人餘賊一
千三百餘人或隨營收伍或安插歸農尚恐猜疑
未化請發

恩諭免死以安反側又言宣鎮營制近議裁併臣思經制
有昔設而今可裁者有今宜設而昔未立者道在
因時變通鎮標舊有鎗礮分隸各營本難畫一今
盡調赴山西協勦臣思火器一營必須專設以資

援勦請於宣屬四營內每營抽撥戰守步兵各七
十五名演習施放別成一營領以遊擊使之朝夕
訓練庶幾緩急足恃疏並下兵部議行六年九月
大軍既平姜瓖餘孽張五桂高鼎劉永忠等竄代
州定襄繁峙五臺山中糾衆犯五臺縣城宣大山
西總督佟養量檄剛阿泰率兵援勦十月至代州
偵賊屯聚竇村我軍悉銳乘夜襲擊斬偽副將張
賓偽守道張秀等十餘人賊驚潰追擊大獲城下

賊聞之懼解圍去我兵躡賊踪凡再敗之高鼎劉
永忠遁入靈邱之曹岩砦據岩險拒守其黨分布
五臺之窰頭柏砦定襄之淳沱七角諸砦七年正
月我軍分路圍勦剛阿泰與右衛副將徐長春由
東北間道進逼窰頭砦破之斬偽副將一賊退守
柏砦塞山隘以自衛張五桂復糾賊赴援我軍攀
崖以上賊失隘驚竄我軍力擊并敗援兵擒五桂
獲偽總兵印餘衆皆降八月淳沱七角諸賊糧盡

亦降我軍進逼賊砦砦高數百丈四面峭削不可
上乃募勇健數十夜半從別徑絙綴援手而登繼
以衆軍發礮直轟砦門賊駭逸偽總兵董景誼等
自焚其巢而死高鼎妻及其父高來貢就俘山砦
悉平八年二月師旋三月敘功加都督同知先是
剛阿泰勦賊時以山西省應解宣鎮兵饟截留散
給移咨督饟主事奏銷戶部以援勦兵內有已經
部議裁汰者駁令宣大總督佟養量核奏尋以調

勦在先議汰在後奏奉

諭旨准銷及銷冊上數復不符為戶科給事中高辛允所劾下養量察審剛阿泰疏劾已陞督標副將之舊任鎮標叅將張世忠冒領侵欺得

旨革世忠職勘擬治罪十年九月養量疏言宣鎮餵銀六萬七千兩有奇侵沒非止一人且恐朦混支銷為數尚多張世忠出入必由自無所逃其罪前任餵司徐兆舉陸元龍扶同銷算罪亦難辭今奉

旨嚴察須直窮到底臣調審領銀之員役剛阿泰身為主
帥俱抗庇不發侵吞之弊顯然請

旨一併褫革赴省質訊奉

旨數萬饗銀任意侵剋大干法紀及奉諭察審經手人員
又抗匿不出殊可痛恨張世忠已經拏問追擬其餘干
涉員役俱令分別嚴行察議議未上剛阿泰劾養量袒
護世忠據其委罪妄扳之詞誣指侵吞抗庇養量
復劾剛阿泰驕悍欺罔疏並下部察議給事中王

廷諫許作梅並以宣府重鎮文武互訐恐致貽誤
封疆交章論劾請

勅三法司拘犯會鞠

上命戶部侍郎覺羅額爾德等赴宣化察審十一年正月
以世忠未曾冒領剛阿泰未曾侵吞督鎮逞忿互
劾覆奏下部議處會

甄別督撫大臣解養量任部議剛阿泰逞忿乖張應革職
其饌銀支銷有無情弊令新任總督馬鳴珮再審

尋奏張世忠具印領支餼即時散給兵丁並無侵
欺值剛阿泰赴陽和閱兵未及申報及回又未面
啟即赴督標新任剛阿泰未見領餼底冊致銷冊
不符因劾其冒領罪在張世忠目無主帥不申不
報應予杖懲疏仍下部核議從之以剛阿泰已經
革職毋庸再議尋回旗卒於家

巴顏

巴顏漢軍正藍旗人李永芳第五子也天聰八年

襲父三等子爵崇德六年任叅領從

太宗文皇帝征科爾沁有功復從圍錦州時明總督洪承疇領兵十三萬來援聞

太宗親征遂退守松山我兵四出追擊巴顏與都統石廷柱等運巨礮以從大敗承疇於松山城下七年三月明副將夏承德獻松山城巴顏與石廷柱等奉旨收藏所獲鎗礮火藥以備用六月增漢軍四旗為八旗巴顏任正藍旗都統八年九月隨鄭親王濟爾哈

朗等征寧遠拔中後所及前屯衛順治元年二月
敘寧遠功晉二等子五月同石廷柱統兵勦昌平
州寇尋同都統葉臣徇直隸饒陽河南懷慶山西
澤州潞安諸郡邑皆下之凱旋

賜白金五百兩二年十一月奉

命帥左翼兵與右翼都統李國翰會定西大將軍和洛輝
於陝西進勦四川三年正月流寇孫守法賀珍等
犯西安府巴顏與和洛輝夾擊之殲其衆殆盡賀

珍復并力拒戰巴顏與副都統齊默克圖擊破之
珍收合餘燼馬步兵約五千列陣山上巴顏登山
奮擊賊衆未戰而走遂追敗之於濠泗河三月收
勦黑水峪斬守法降賊衆二千進勦流寇一隻虎
於商州賊兵二萬據山為陣巴顏與和洛輝督戰
斬萬餘級復率兵偕副將王平等擊敗延安諸路
流寇追賊至張果老厓賊入山寨我兵掘濠圍之
夜潛攻克其寨擒斬賊渠獲馬贏無算五年六月

敘功晉一等子十一月帥左翼兵載紅衣礮赴大同討叛鎮姜瓖六年隨睿親王多爾袞復渾源州又隨英親王阿濟格復左衛隨巽親王滿達海復朔州汾州及太谷諸縣巴顏在軍中每指麾左翼兵發巨礮以攻所向皆克八年敘平姜瓖功晉三等伯兩遇

恩詔加至一等伯九年正月卒年三十有三

賜祭葬如例子釋迦保襲爵

佟岱

佟岱漢軍正藍旗人先世居佟佳父佟三

太祖高皇帝時來歸任副都統佟岱其第三子也初任佐
領崇德元年從

太宗文皇帝征朝鮮師還以縱掠降民巧言掩飾論罪應
死

命從寬罰贖革佐領奪俘獲三年授吏部副理事官兼任
叅領六年隨大兵圍明錦州明援兵自城出戰佟

岱率兵擊敗追至城壕始還其夜明兵犯我營欲奪紅衣礮佟岱與副都統金維城奮擊卻之七年四月隨鄭親王濟爾哈朗攻克塔山杏山及附近諸臺堡六月擢正藍旗漢軍副都統八年隨鄭親王征明寧遠拔前屯衛及中後所二城敕功予騎都尉世職順治元年同都統葉臣等征山西以礮攻克太原城二年隨英親王阿濟格勦流賊李自成於陝西敗之延安追至湖廣獲賊船於富池口

英親王征江西至九江班師佟岱與投誠總兵金聲桓駐守九江府旋遣兵與聲桓平定南康南昌建昌撫州袁州等府以所俘獲奏

聞因疏言故明鍾祥王朱慈榮等皆衰殘廢棄或姑存餘喘以彰我

朝浩蕩之仁得

旨故明諸王俱令赴京朝見時湖廣總督羅繡錦未之任佟岱暫署湖廣總督三年率兵還京授兵部左侍

卽是年秋隨恭順王孔有德征湖南四年自岳州
進長沙偽總兵王進才等聞風遁師次湘潭偽伯
黃朝宣擁衆數萬屯燕子窩佟岱與有德及副都
統藍拜等由水道進據瀘口擊破北岸營追擒朝
宣於衡州進攻寶慶克之聞明桂王朱由榔據武
岡夜發兵疾進敗其衆并焚木城又敗其國公劉
承允於夕陽橋遂克武岡由榔遁廣西五年十月
凱旋得

優賚敘功加一雲騎尉六年隨睿親王多爾袞討大同叛
鎮姜瓖敗賊兵於傅家嶺又同都統左夢庚擊敗
賊兵進拔渾源州及左衛朔州汾州太谷等城敘
功並三遇

恩詔晉世職至一等輕車都尉兼一雲騎尉累遷戶部吏
部侍郎十一年擢浙江福建總督十二年冬海賊
鄭成功陷舟山十三年正月復陷台州時佟岱與
巡撫秦世楨不協劾世楨運饟不繼致舟山士卒

叛降世楨亦劾佟岱不巡閱海疆且不循例駐衛
州欲以巡撫解署自居忿戾相爭逞私詆誣狀

上調世楨為操江巡撫

詔佟岱解任還京佟岱不即行且上疏自敘勦撫功

上切責其冒功戀祿

命新任總督李率泰巡撫陳應泰會同巡按御史王元曦
察核佟岱與秦世楨挾忿相爭貽誤封疆情罪率
泰等覆奏舟山失陷世楨不能先事密防咎亦難

辭佟岱忽爭失體久駐杭州不一至海濱實貽誤
封疆疏下部院確議世楨應降一級調用佟岱應
降世職一等

上以所議尚輕飭再議革去

恩詔所加世職留其軍功所得三等輕車都尉康熙二年
卒子佟徽年襲

佟國印

子世德

佟國印漢軍正藍旗人父佟恒年以驍騎校隨其

從父佟養正守朝鮮界之鎮江城

太祖高皇帝天命六年守城中軍陳良策叛執養正投明
總兵毛文龍恒年亦被執不屈死贈騎都尉世職
以弟成年襲尋卒國印襲職

太宗文皇帝崇德三年授工部副理事官六年隨睿親王
多爾袞征明圍錦州與都統石廷柱擊敗呂洪山
步兵

上親統大軍進征圍明總督洪承疇於松山敵兵有逸入

高橋南三臺者國印與都統劉之源以礮攻克之
盡殲其衆七年四月鄭親王濟爾哈朗等圍杏山
塔山國印俱以礮擊其城下之敘功加一雲騎尉
尋遷工部理事官奉

命同副都統馬光輝等赴錦州督鑄神威礮十月隨饒餘
貝勒阿巴泰征明由黃崖口入邊時明將於沿邊
設臺駐兵防守甚密國印同都統李國翰屢擊敗
敵衆克邊臺七又擊敗牆子嶺守兵八年鄭親王

征明寧遠既克中後所進取前屯衛國印以紅衣礮擊其城風迴礮火傷領下創甚攻城益力卒克之順治元年敘功晉二等輕車都尉三年擢工部右侍郎六年任都察院叅政七年九年三遇

恩詔晉爵三等男十二年以疾解任康熙十一年四月卒賜祭葬如例子世德初因國印乞休襲爵尋授叅領康熙十三年擢正藍旗漢軍副都統十四年八月隨貝勒洞鄂征叛鎮王輔臣於平涼賊衆迎拒世德同

都統海爾圖率兵擊卻之賊復倚山據險列陣世德率兵直前衝擊破賊陣追斬甚衆十五年同前鋒統領穆占設伏於平涼之南山擒賊偵卒擊敗賊騎百餘賊將屢糾衆來犯世德率兵五戰皆捷復以紅衣礮擊毀賊壘殲賊無算尋招降王輔臣及其叛黨陳彭等並在事有功十七年

命隨撫遠大將軍圖海規復漢中興安十九年五月卒於軍

賜祭葬如例子銓襲爵

馬如璧

馬如璧遼陽東寧衛人隸正藍旗漢軍

太宗文皇帝崇德五年任驍騎校隨睿親王多爾袞圍明
錦州敵以千餘騎出城迎犯如璧隨侍衛李國翰
戰卻之復擊敗松山步兵及杏山騎兵尋進攻杏
山松山兩路臺堡並隨都統石廷柱以紅衣礮破
之六年隨鄭親王濟爾哈朗圍明錦州攻克駱駝

山寨敵兵自十三站乘夜來襲營佐領禧福率甲士出戰如壁同叅政碩詹馳馬陷陣殺敵甚力會明總督洪承疇等合步騎十三萬來援錦州

上親統大軍駐營松山

指授方畧如壁隨都統巴顏石廷柱等徇塔山路以紅衣礮攻下附近諸臺七年授佐領隨鄭親王取塔山杏山二城八年復隨鄭親王取中後所及前屯衛皆以紅衣礮攻城有功順治元年敕功予騎都尉

世職兼任叅領二年隨英親王阿濟格勦流賊李自成於陝西追至湖廣屢戰皆捷與叅領劉仲錦等擊走偽總兵馬進忠於武昌獲賊船十有一六年隨鄭親王征湖南時明桂王朱由榔據武昌自成立遺黨李錦劉體純王進才皆附之分據寶慶衡州如璧由岳州進長沙趨衡州屢擊敗其兵復同副都統金維城破之於靖州其衆皆潰奔如璧奮力窮追遇伏步戰力竭歿於陣七年遇

恩詔於騎都尉加一雲騎尉尋議卹晉三等輕車都尉子
純德襲

世宗憲皇帝時以如璧入祀昭忠祠

劉仲錦

劉仲錦遼陽東寧衛人後隸正藍旗漢軍

太宗文皇帝崇德五年任佐領隨睿親王多爾袞圍明錦
州敵騎兵千餘自城中出戰仲錦隨左翼兵迎擊
追至城下始還尋復擊敗松山步兵杏山騎兵及

呂洪山口步兵七年鄭親王濟爾哈朗攻塔山發
紅衣礮擊其城西城圯二十餘丈仲錦率所部兵
先登克之進攻杏山城復以礮擊毀城垣二十五
丈城中窘迫遂降敕予雲騎尉世職八年三月
隨護軍統領阿爾津哈寧阿等征黑龍江呼爾哈
部克其博和哩諾爾噶勒都里三屯俘獲甚衆招
降小噶勒達蘇大噶勒達蘇綽庫禪能吉勒四屯
凱旋

賜貂皮白金九月隨大兵征明寧遠以紅衣礮攻克中後
所前屯衛二城敘功晉世職為騎都尉順治元年
大兵既定燕京仲錦任戶部理事官兼叅領隨都
統葉臣征山西取太原府旋隨英親王阿濟格勦
流賊李自成於陝西追至湖廣屢擊敗賊衆偽總
兵馬進忠遁獲其戰艦十有一年擢兵部侍郎
六年隨睿親王討大同叛鎮姜瓖復渾源州左衛
及汾州皆以紅衣礮攻城有功七年授山東臨清

總兵官加都督同知先是仲錦以征流賊平姜瓖
功晉三等輕車都尉世襲罔替復以考滿並三遇
恩詔洊晉一等輕車都尉兼一雲騎尉十年改福建右路

總兵官加左都督鎮守泉州十一年八月

上以仲錦有疾不能任事

詔解任還京調治尋卒

賜祭如例子芳聲襲

張朝璘

張朝璘漢軍正藍旗人父士彥明廣寧巡撫中軍
守備天命七年

太祖高皇帝征廣寧明巡撫王化貞遁去士彥來降天聰
八年授三等輕車都尉旋乞休朝璘襲職崇德七
年任佐領隨貝勒阿巴泰征明過北京往攻登州
府師次膠州遇敵兵擊敗之八年隨鄭親王濟爾
哈朗征明攻克中後所前屯衛二城晉世職二等
輕車都尉任兵部理事官順治二年隨豫親王多

鐸征江南以紅衣礮攻克揚州府城及江陰縣城
尋率兵駐防蘇州遇明總兵黃蜚等擁衆來犯同
副都統吉山擊卻之復同前鋒統領努三率兵追
勦黃蜚等敗退旋合兵從水路來犯朝璘同叅領
索爾敏進兵擊之潰獲其船四年隨恭順王孔有
德平湖南時明桂王朱由榔據武岡州朝璘與協
領烏赫訥率兵疾進夜遇明總兵曹志建扼於路
朝璘督兵擊之敵敗奔入木城朝璘進攻擲火毬

木城中城焚敵衆大潰其國公劉承允率衆拒戰
朝璘偕諸將擊敗之夕陽橋遂克武岡州承允降
明桂王走靖州其將張先璧據沅州別部衆據黔
陽縣列五營朝璘同副都統蘭拜等敗之進克沅
州府六年隨睿親王多爾袞討叛鎮姜瓖於大同
復渾源左衛及朔州汾州太谷等城是年以考滿
稱職晉一等輕車都尉八年敕江南湖南山西功
晉三等男旋授正藍旗漢軍副都統九年兩遇

恩詔晉一等男十年授都察院左副都御史十三年遷戶

部侍郎尋奉

命巡撫江西時南昌瑞州當金聲桓叛亂後農田荒蕪賦

額多虛巡按御史笈重光請豁免部臣恐有以熟

作荒情弊請下督撫議朝璘覆奏荒蕪田畝惟循

序勸墾則熟者常熟荒者不致久荒若編派起科

則始焉包荒於熟漸至熟者仍荒非足國恤民計

今南昌瑞州二府新墾荒田四千餘頃應三年後

起科其未墾者二千餘頃請槩與豁除以勸墾耕而資生聚得

旨允行十五年以解廣西協餉功加兵部尚書銜十八年

擢江西總督康熙二年江西右布政使王庭奏減南昌府屬浮糧下朝璘議朝璘疏言江西自陳友諒橫行徵派明代相沿未改前巡按御史吳贊元切陳其事部議令確核志牘旋遭金聲桓叛亂志牘散亡是以前撫臣蔡士英僅據右布政使莊應

會所得故牘請減袁瑞二府額徵而未及南昌令志牘復出惟武寧縣因陳友諒生身之地未浮宋元舊額其餘六縣一州浮糧請

勅部察核志書減免尋部臣覆奏浮銀十九萬五千餘兩米十四萬九千餘石

上命悉與豁除三年朝璘疏言吉安府向食粵鹽相隔千餘里且有十八灘之險請改食淮鹽俾商民交便事下所司從之四年以江西總督裁併江南解任

五年正月補福建總督六年以老疾乞休還京越
十餘年卒子聖鐸襲一等男爵

佟國瑤

佟國瑤漢軍正藍旗人二等子佟養性之孫也養
性卒子普漢六十遞襲六十於順治初年三遇

恩詔晉三等伯授副都統子國瑤順治十七年襲伯爵康

熙九年擢正藍旗漢軍副都統十二年十二月逆

藩吳三桂反

上以湖南鄖陽地界三省山谷阨塞奸民易嘯聚且恐賊

乘間侵犯

特授國瑤為鄖陽提督往駐防十三年三月襄陽總兵楊
來嘉通吳逆據穀城叛鄖陽副將洪福應之刼所
部兵千餘反攻國瑤署國瑤率遊擊杜英佟大年
以健丁三百名奮勇衝擊賊退復來連日格鬪十
餘陣斬首二百餘級賊遁走疏

聞得

旨嘉獎下部優敘加左都督十四年四月洪福及叛將等
分五路犯鄖西復大敗之追勦至泥河口板橋河
陣斬偽副將林躍等七人殺賊兵數百十五年三
月四川叛鎮譚洪犯鄖江北岸洪福等出掠鄖江
南相聲援國瑤分兵勦禦敗賊於坪溝黃畈九里
岡又渡江擊賊於南岸連敗之焚其舟械擒斬無
算九月洪復遣衆伏鄖江兩岸以三十餘舟順流
下泊琵琶灘進逼鄖陽運道塞國瑤與將軍噶爾

漢撫治楊茂勲等率水陸兵大破之於沿江及陡
嶺糧運始通敘功加一等十六年七月以捐賞兵
丁難民功加太子少保十七年二月進勦楊來嘉
洪福諸逆於房縣擒偽副將以下五十二人獲偽
印十二劄牌二十四房縣保康相繼復十八年五
月偕噶爾漢等勦賊於興安以日久未下部議盡
削前功

詔止削陡嶺所敘一等功二十一年六月授福建將軍

諭曰國家設立督撫提鎮原以為民孟喬芳總督陝西李
率泰總督福建能潔已奉公愛民恤士秦閩人至今思
之爾到地方宜恪遵國憲安輯兵民二十二年四月疏
言京口將軍所統每旗協領叅領防禦驍騎校共
十七員今福建駐防每旗止四五員邊海重地軍
務不可乏員料理請增協領以下驍騎校以上等
官下部議駐防四旗應各設協領一員叅領一員
防禦五員驍騎校五員二十八年八月卒於任

賜祭葬如例謚忠愍其伯爵以子海福襲

佟養甲

佟養甲遼東人先世為滿洲居佟佳繼遷撫順父
佟拱隨族人養正等來歸後隸漢軍正藍旗

太宗文皇帝時養甲入直內院理事順治元年從

世祖章皇帝定鼎燕京二年授總兵官銜隨貝勒博洛率

師南征越明年下杭州平福建十月加巡撫廣東

銜署兩廣總督事與署提督李成棟率兵定廣東

是時明唐王朱聿鍵弟聿錫據廣州擁兵聚寇僭號紹武養甲與成棟定惠潮二府亟趨廣州令前鋒軍悉用紅帕裹首偽為廣州援兵狀以惠潮道印為文書紹守者奪門入擒其諸王世子十三人復與成棟議以南雄韶州兩郡連控江楚肇慶為兩粵咽喉梧州為粵西門戶宜先撫南韶以通江右之援定肇慶以扼兩粵之吭取梧州以固肇慶之藩乃檄總兵葉承恩及副將李仰臣兵進南韶

成棟兵進肇慶皆授策勦撫三郡悉平會明閣部
丁魁楚擁明桂王朱由榔自肇慶竄梧州養甲復
令成棟移兵進勦魁楚等皆遁走遂下梧州分遣
總兵徐國棟取高雷廉瓊四府養甲自駐廣州招
降海上四姓賊首鄭昌四年加兵部尚書銜實授
總督兼任廣東巡撫時標營將士調遣四出廣州
駐兵僅存百餘人海賊馬元生石壁徐貴相及白
旗賊黃信林芳等窺伺兵力單弱集聚數萬突犯

廣州養甲督令官兵守陴躬冒矢石扼太平門關
外橋梁鼓勵鄉勇力戰殺賊陣斬數百級生擒百
餘人餘賊遁入海尋偕成棟率兵徇增城順德東
莞三水新寧諸邑皆就勦撫明總兵李承志李明
忠以平樂潯州二郡兵來降即令收定左江右江
諸路六月招降明趙王喬朱由棧及其將李士璉
七月明閣部陳子壯尚書張家玉率賊萬餘寇廣
州指揮楊可觀將以城為內應養甲伺其謀擒斬

之督兵守禦成棟亦以兵赴勦焚賊舟賊遁越六
日復來犯又敗之是時廣州初定監司守令未及
銓授養甲疏請廣東布政使耿獻忠為廣西巡撫
復慎簡廉吏請

旨酌用又請移大同兵五千至兩廣資防勦其頻年隨征
士卒增給資糧以示優恤凡新降將卒才勇者或
留營訓練或分駐要隘餘令歸農會部議徵順治
三年額銀四分之一以給餉養甲言粵省連遭寇

掠請緩至順治四年為始諸疏並下部議行先是
雷廉二郡珠池每歲例遣官開採養甲以地險費
繁恐傷民力請罷其役得

旨俞允時明桂王朱由榔據桂林兩廣人心觀望有潛附
由榔黨屬孫可望入滇黔為寇者養甲策遣將士
進攻由榔疏請造弓矢火器備戰具分遣禁旅進
勦雲南貴州

上以廣西未定而恭順王孔有德已奉

詔軍湖南防勦孫可望

特諭養甲悉心安輯兩廣所請俟有德疏報再議養甲之署兩廣總督也成棟以總兵署兩廣提督率師偕往既而養甲奏平定粵嶠成棟功多請實授成棟為廣東提督成棟自負功績以養甲奏授官職不兼兩廣意殊不平又素與養甲部將郝尚久爭功有隙遷怒養甲五年閏四月成棟據南雄叛受由榔封爵與江西叛鎮金聲桓互為聲援養甲移書

贛州守將策應書為成棟所獲益恨之乃以兵四百人劫養甲擁至肇慶養甲詈賊不屈成棟密使其黨張祥賊殺之事

聞贈太子少保廕一子入監

予祭葬入祀昭忠祠及廣東名宦

李日茆

李日茆遼東人

太宗文皇帝時日茆以生員入內院理事

賜人五戶隸漢軍正藍旗順治元年定鼎燕京授日茆直隸永平府知府三年遷霸州兵備道既之任授策州牧張儒秀諭降土賊李振宇等數百人尋擢左僉都御史四年加右副都御史銜任操江巡撫會叛鎮金聲桓蹂躪江西上游告警日茆親督官兵於小孤山磨盤洲扼勦檄江防同知趙廷臣與叅將汪義遊擊袁誠等迎擊賊艘五年敗賊於彭澤賊兵中礮及溺死者無算獲戰艦二十餘六年五

月裁安徽巡撫

命日芄攝其事先是安慶府之桐城潛山太湖三縣有賊渠余尚鑑者以擁立明宗室朱統錡為名糾金聲桓餘黨據險為巢凡二十餘寨時出侵掠十月日芄遣副將梁大用等攻皖澗寨克之進圍飛旗寨凡七日斷賊水道賊兵四出衝突日芄分兵為四路合擊之賊衆大潰連拔飛旗桃園等寨獲朱統錡及余尚鑑斬之大和山小和山等十八寨相繼

歸順七年加兵部右侍郎十年發兵勦徽州府之
赤嶺土賊斬賊首張惟良諭降其衆十一年二月
特旨甄別直省督撫

詔加日茆兵部尚書是時明魯王舊將張名振屢犯鎮江
瓜洲截刼漕艘日茆於鎮江城外檀家洲水淺處
植木樁深處編木筏環以鐵索大江南北岸及金
山俱列大礮南岸自鎮江至圖山北岸自瓜洲至
三江口更築新隄造木橋以通巡兵往來令圖山

瓜洲等四營守備率哨船水師更番防禦羣賊潛匿江中謀寇掠輒為標營偵擊俘斬畧盡十二年八月加太子太保十一月卒

賜祭葬如例謚忠敏立碑墓道

秦世楨

秦世楨廣寧人隸正藍旗漢軍順治二年由貢生除直隸文安縣知縣三年行取考選授四川道監察御史疏言各省賦役有

恩詔裁免而奉行未盡一者請令州縣具冊呈部核定發刊俾知遵守得

旨允行四年巡按浙江以審擬叛案輕重兩請部議降一級調用世楨疏辯以巡撫蕭起元不先咨議徑列其名入奏無由駁正

命復原官六年巡視北城八年以六等甄別臺員世楨列一等尋

命巡按江南是年八月疏言臣自淮揚至蘇州察知蠹役

害民有勘鞫得實者嚴治其罪而揚州蠹役聚黨
百五十人宰牲盟誓欲并力合攻訴告之人臣已
執為首者數人繫獄待訊因思懲積蠹於事後不
若立法使不為蠹請

敕督撫司道及府廳州縣毋於經制外濫設胥役一人並
定以年限勿容久充

上是其言如所請時當兵燹之後田畝界址混淆者多官
為丈量胥役乘以舞弊世積令里長編列魚鱗冊

新舊互核使業戶自相丈量贏縮胥復其舊荒坍
並區別之又前此州縣徵賦民有逾額輸納者世
槓限夏稅五月秋糧九月先給易知單示以科則
定數然後開徵又每甲彙列賦額及輸戶為滾單
使里長按戶遞傳既輸則填註之違則送縣追比
以省追呼三者皆先行之蘇州人以為便遂條列
以

聞通行諸郡又以徵銀設櫃之制有司奉行不實請增司

府印封日收簿亦鈐司府印輸戶自封投櫃驗數
書之簿別與印單執之將啟櫃封先申牒院司候
稽核復請革僉點糧長民兌漕運之例改為官收
官兌疏並下部議行著為令十月劾巡撫王國寶
貪婪狀

詔革國寶職下總督馬國柱會同世楨訊治世楨復言江
南素稱澤國民之無田里樹畜者以捕魚資生蘇
常鎮三府舊有漁戶歲輸公用銀不列正課自國

寶為巡撫加徵十倍漁戶力不給終年敲扑苦累
日深請概行禁革得

旨下部核議飭禁十年還京遷大理寺寺丞十一年授浙
江巡撫時海賊鄭成功侵據福建窺伺浙江世楨
條列移兵防守增造戰艦精選水師諸要務又以
沿海漁船往往容匿賊匪宜以時稽核請籍其姓
名按保甲法以二十五船為一隊責成鎮道譏察
無事聽其採捕有事則助守禦疏並議行十二年

海賊掠温州台州寧波復聯結賊衆數萬犯舟山
副將巴成功從賊賊遂據舟山先是賊陷漳州總
督佟岱移浙江各營步騎三千率以赴援至是佟
岱還杭州以戰艦巨礮不速造漁船採捕弗禁止
咎世楨連章入告


上命部臣核議部臣以礮艦造未逾期漁船採捕一年以
來世楨奏獲越境私市者三十餘人未嘗疏縱予
免議佟岱復劾世楨不給餼舟山致士卒叛降且

薦庸懦之巴成功為副將貽誤重地世楨訴給餼
循例無缺薦擢由提督田雄主議因述佟岱怱戾
逞私狀疏並下巡按御史察奏給事中王紀謂浙
閩方用兵督撫嫌隙已成恐悞事機請即予更調
上乃調世楨為操江巡撫代以山西巡撫陳應泰及巡按
御史葉舟察奏世楨無罪佟岱怱戾逞私有據
詔佟岱解任以兩廣總督李率泰代之

命世楨暫管總督事俟李率泰既至赴新任十三年七月

世楨赴任操江會佟岱已還京

上復命李率泰陳應泰會同巡按御史王元曦確核仍如
葉舟所奏下部議以舟山失陷未及恢復世楨亦
不能辭咎應並與處分十四年三月革佟岱世職
世楨先以京察才力不及議降一級調用至是革
職時世楨年已老尋卒於家



欽定八旗通志卷二百六